



Rabu, 03 November 2021
Ogen: Esekiel 18:10-13



Perbahanen Si Melket



Adi rumah melket, erbahanca rehen laneng. Melket erbahanca mbau dengen mpeturah pinakit man kalak si ngiani rumah e. Mekatep sikataken maka rumah bersih e rumah sehat. Bersih e penting kal, mereken ngaruh ku semangat ngeluh, senang si akap tading i je janah kalak sideban pe mesikel reh ku je. Ogenta wari enda nuriken kerna perbahanen bangsa Israel si melket. Iandingken bagi sekalak anak si rusur ngerampok dengen munuh, man persembahen si ipersembahken i bas ingan persembahen begu-begu, nggoda ndehara kalak, nipu kalak musil, ngerampas barang kalak, la ngulihkan barang jaminen kalak, nembah man gana-gana dengen pebungaken duit. Si enda kerina perbahanen si melket ilakoken bangsa Israel. Perbahanen e mabai kinirugin man kalak sideban. Janah tangkas ikataken maka kalak si bagenda labo banci nggeluh tapi ngaloken ukumen i bas Dibata nari. Mate erkiteken perbahanenna si melket e.

Perbahanen si melket situriken ogenta e me perbahanen si terjeng ngukurken dirina/kepentingen ras kesenangenna saja, janah maba kinirugin man kalak sideban. Erbahanca kalak sideban lanai ngaloken hakna erkiteken enggo irampas.

Bagi perlangi katak, adi ia erlangi arah lebe ndatken lau meciho igemburina segelah si erlangi arah pudina lanai ndatken lau meciho. "Gundera sala gundera, buluh belin ku benturi, kutera-kalak kutera, beltekku mbelin ku besuri" nina si erpantun. Perbahanen si bage la ngena ate Dibata, maba pinakit dengen kalak si bage ngaloken ukumen i bas Dibata. Ciga ate Dibata perbahanen si melket, sabap Dibata encidahken kekelengenNa man manusia alu la ngukurken diriNa saja, tapi mereken si mehulina guna manusia, janah nggit erkorban guna kiniulin kalak sideban. Bagelah kita nggit mereken si mehuli guna kiniulin kalak sideban.